

卷二

# 生死



◀ 攝影：陳嘉興 陳嘉興

攝影地點：台南北門雙春濱海沙灘

## 半空中呸血

何時無距離？我就看著你  
看著你目矚一直咧點火  
燒空氣？燒家己  
欲燃珠淚？一時，半空中  
沖沖滾

何時？人叫咱來台海天頂相會  
有話？風飛過  
無話？心槽衝火  
藍天綠地，半空中，一時  
呸血



## 戰火炕一鍋

823 炮戰，四面海水起燃起滾  
燒喔！閣較大聲  
嘛無路通過，無法度閃身的命運  
孤屨！骨疊骨，盡坵  
台海這窟

823，金門燒燙燙  
阮老爸孤囡無去做充員兵  
伊講無看過，無看過戰火炕一鍋  
毋知影湧仔花  
滾人血

【  
0  
2  
7  
】  
戰  
火  
炕  
一  
鍋

- PS 1) 無路通過：無路可過。  
2) 孤屨 (koo-khù)：台語自責自罵口頭禪，原意：  
全無親人的孤癡怪胎。



## 蠓掙仔一起掙

牛尾毛無啥蔭，一颺起  
干焦一點仔風  
搨家己的尻川顛  
掙袂死胡蠓蠓仔妖魔鬼怪  
閣再來

蠓掙仔一起掙，無風絞螺仔旋  
有鼻拔長長，軟無自由空氣  
有耳貼天庭，聽無霆雷公  
天清清地靈靈，戰爭無損鐘  
無人咧喝停

【  
0  
2  
8  
】  
蠓  
掙  
仔  
一  
起  
掙



PS 蠓掙仔 (bàng-sut-á)：道士法器，狀似牛尾尖的拂塵。

## 司公弄鏡

鏘鏘鏘！鏡一響  
椅條隨跳起來，跳上桌頂  
司公飛起--去，椅條伸手相握  
雙趺踏上天篷，人倒吊  
一條線，吊心肝

鏡一響  
你隨伸出雙手  
手模合做一粒心  
捧咧！少女的祈禱  
等欲白首偕老

㊦ 司公弄鏡 (lāng-láu)：司公(道士)法事後耍特技安撫喪家。/ 鏡：鏡鉢。

【  
0  
2  
9  
】  
司公弄鏡



## 十二婆姐陣

倒手掌傘，毛毛仔雨  
你佇江湖若是閣咧走路  
停一下，先拭汗  
免驚！幼嬰已經轉晟  
掌你的雨傘

正手擲葵扇，涼涼仔風  
恁老的閣佇田裡咧翻塗翻袂停  
你遠遠共叫一聲仔阿爸  
免驚！阮十二婆姐，嘛會  
替你搖孫仔



## 蜈蚣陣

上疇上光榮  
用來妝扮咱的囡仔  
予像帝相將軍佾星君  
坐佇頂懸，予看著跤底攏是  
扛伊行的父母

36 天罡 72 地煞 108 將  
如同布袋戲咧扮仙  
百足真人蜈蚣陣  
斬妖除魔，嘛愛一輓一輓蜷庄  
分糖仔食喙甜

【  
0  
3  
1  
】  
蜈  
蚣  
陣



**PS** 一輓一輓蜷 ( khùn ) 庄：一圈一圈纏繞村莊。



## 白鶴陣

土城仔香白鶴陣誠出名  
阮大舅是白鶴頭，喝水會堅凍  
一開館，我隨飛去，看人  
暗暝練宋江  
排夢

彼陣阮老爸佇海墘掠魚栽  
常在峯欲拍欲擲，大舅出面  
海岸線，阿爸才橫咧行  
嘛按呢，我開始食鐵牛運功散  
拍夢

【  
0  
3  
2  
】

白  
鶴  
陣



註 台南四大香醮：西港香、學甲香、蕭壠香、土城香。

## 肝炎：追無性命

阮看著一陣鳥仔咧追樹林  
樹林追山，山追日頭  
追到黃昏 in 兜  
山已經用樹林門門矣  
鳥仔吼救救

彼陣，阮小舅仔佇鐵路局  
每日追巡火車，火車追巡鐵枝路  
一户一户，干焦小舅仔無轉來  
病院講愛逐錢，錢四跋  
人追無性命

【033】  
肝炎：追無性命



## 癌症：天開刀

地下趕工，鞏好地基  
裝潢好加護病房  
雲，急診入來  
換衫，隨  
手術

彼陣，二舅肺癌等無床  
排隊佇病雲後壁  
阮大囝腦癌傷痕傷重，等無天光  
這陣醫學，天公無好勢，隨  
開刀



## 糖尿病：山換血

地面愈來鞏愈濟紅毛塗  
樹木毋是軟無水就是滿腹溘溘  
傷鹹傷甜！攏爛根  
爛做土地，一片  
棺柴枋

阮妹婿職業是種樹仔  
伊的血根迴山頂  
毋知按怎糖尿病愛洗腎  
逐擺換血，若山  
換溪水

【035】  
糖尿病：山換血



## 烏腳病：畫家己

討海人躉出躉入風湧  
若杜蚶仔佇塗底咧犁田  
彼陣攏淋地下水，煞來著烏腳病  
愛一節一節一槓一槓  
切斷跂

拄開始，跂指頭仔跂盤反烏  
無隨切斷就淤上跂胴大腿  
愛規支跂鋸掉，作穡人無跂  
嘛用頂身潑塗，蹓土地  
畫家己



## 憂鬱症：暗殺人

一看著影，大頭拇隨擲頭  
指指比出敵人位置  
中指尾指仔三支馬上合倚來  
開銃！ pòng ! pòng ! pòng  
大聲喝！死矣喔

伊追去看，影，彈無死  
愈追走愈遠！真鬱卒  
人叫食飯，應講等影收拾起來ê  
叫伊睏，講睏去，影會閣轉來  
夢裡暗殺人

【037】  
憂鬱症：暗殺人



PS 指指 ( ki-tsáinn ) : 食指。

## 羊眩：攬做一人

有一擺佇魚塭仔裡，塭水成人深  
阿娘閣羊眩發作，啊一兩聲  
老爸遠遠衝過去，衝出一條若水龍車  
噴起來的路，水中十字交叉  
雙人對影成四人

老爸使力大聲叫，我共妳榘直撐牢  
攬牢矣，喘氣緊喘氣  
四人才閣變回兩人，兩人攬做一人  
愛會記得！我若無佇，換你攬伊  
彼陣我驚水的七歲

【  
0  
3  
8  
】  
羊  
眩  
：  
攬  
做  
一  
人



- PS 1) 羊眩 (iunn-hîn) : 癲癇。  
2) 榘 (kīng) & 撐 (thènn) : 撐住、支撐。

## 詩人節急診

救護車像比賽的龍船  
衝到病院頭前  
開門、擲落！一粒一粒肉粽  
江邊排列，等快篩  
祭江莫相害

人潮窒佇急診  
門一開、嘩啦！若水沖跳斷崖  
直接投江較快出海  
我一跳落，江水包粽，粽包人  
屈原無相仝

【039】  
詩人節急診





## 無較縫的生活

你若頭戴玫瑰花瓣約情郎  
千萬毋通相攬  
大街小巷嘛毋通烏白牽  
花芳佻病毒攏相仝  
會啞人穢人

若是戴葵笠仔  
來台北遮莫坐公車  
車內攏有貼你的詩逝  
共講你寫的，閣戴桂冠  
嘛是無較縫

【  
0  
4  
0  
】

無較縫的生活



PS 無較縫 (bô-khah-tsuah)：沒有用。

## 黃昏之害

嬌查某囡仔來看黃昏  
日頭欲轉去暝  
跛步煞變慢吞吞  
海湧起滾，講我隨關門  
予你明仔載失眠

嬌查某囡仔來看黃昏  
晚霞欲落舞台矣閣重抹粉  
雲起問，猶未到春分  
暗頭仔 6 點半矣閣叫我拍通光  
害月娘無愛照眠床



## 夢叫人

20 冬前我共土地挖空  
一空一空烏攏攏  
將向望攏埋入去烏暗  
無想著老去的夢，閣轉來  
叫我的人

夢是一款色緻一種滋味  
日子晒去的種子  
種落的時，陷眠沃水，醒來無記持  
想講已經無望，結果春來叫門窗  
老ê！愛等阮



## 照鏡罵鏡

入冬，樹林佇風中照鏡

愈照愈奢颯

最後攏褪光光

賸兩三葉掩佇根

死等春

春一來，隨共樹仔攞咾攞咾

袂堪得！一枝一枝盡吐穎

吐甲規粒山起癢，照鏡

一片烏 má-má，起罵！死風颯

遮早出來

【  
0  
4  
3  
】  
照鏡罵鏡



## 台灣紅檜

若是雷公爍爍拍倒ê  
樹皮攏臭火焦，內肉閣誠鮮況  
鼻會出，用血沃火的味  
裂開的樹心攏直直直奔走，看會出  
硬插！欲閣倚起來

如果是予歲月偃倒  
該然規攏好好躡原地，予下一代  
直接對你身軀倚起上天去  
我來到遮，塗跂窻窻窻窻，聽會出  
咧講！莫閣踏著阮



## 台灣松梧

Hinoki ? 咱佇佗位

風雪白茫茫，看無你的墓  
寒冰堅凍，挖無你的身  
想欲祛骨共你做成木乃伊  
山頭煞抗議

Hinoki ? 咱佇佗位

挽開阿爸細漢時的菜櫥仔  
一陣松梧味，芳是芳  
毋過櫥仔內攏空空，賸幾尾豉腩鹹魚  
無想欲翻身

ㄟ 松梧 (siông-ngô) : 台灣黃檜，學名「台灣扁柏 (Chamaecyparis obtusa var. formosana)」。大部分人攏聽過or叫過松梧的名，但是足少看過，看著的往往是〈紅檜〉！

這二種台灣特有種<神木>的俗名、日本名、台語名如下：

1. 【Hinoki】(タイワンヒノキ) : 台灣黃檜，國際專稱〈台灣扁柏〉，俗名叫「厚殼仔」。
2. 【Meniki (noki不發音)】(タイワンベニヒノキ) : 台灣紅檜，俗名叫「薄皮仔」，木工師傅慣稱〈Meniki〉。

〈第四紀〉一萬多年前最後的冰河退去，黃檜才首次和紅檜在台灣相見。



## 杵音牽詩

擂槌是長長驚嘆號  
石舂臼是圓圓的句號  
邵族人恁雙手擲驚嘆號捶落  
五穀脫殼，四季出汁浮字  
煮麻糍的詩

硬硃硃的杵直直直的尻脊  
捶出軟膏膏的麻糍  
看起來澹澹，愈看目箍愈紅  
愈相目調愈澀？是按怎杵音  
牽詩遮爾仔孽



## 佇佗位

Zintun 是恁的海，海是一張紙  
獨木舟佇無風無搖的紙面  
搖櫓寫字，倒手另一劃正手另一劃  
一個人一個人印佇日月潭  
四蕊目矚攏澹澹

Lalu 是恁邵族的聖山  
海水欲暍的眠床  
佯眠夢相向，等欲天光的目矚  
這陣看去攏珠淚？看無  
光華島佇佗位

【  
0  
4  
7  
】  
佇  
佗  
位

- 註 Thao (邵族族名)：邵族語「人」之意。  
Zintun (日月潭)：邵族人口中的海。  
Lalu (光華島、珠嶼、玉島)：邵族語「心中聖山、  
祖靈地」。





## 沉沉浮浮

風佇樹林奔走一跤懸一跤低  
摔落江底咧叫你  
你敢有聽著看著？出海口  
風捲湧，湧吞風  
害雲沐沐洶

60年代，台灣西海岸攏咧攬魚栽  
討海人暝時披一領烏暗去坎海  
圍咧共海湧攬頭毛  
海湧圍咧共人剃頭！一片  
沉沉浮浮



- 【PS】 1) 沐沐洶 (bok-bok-siû)：載沉載浮掙扎，喻處困境。  
2) 攬 (lu) 魚栽：推網具捕魚苗。  
3) 攬 (lu) 頭毛：推剪器剃頭髮。

## 拐仔聲

阮小弟五年來腦癌開刀四改  
我時常欲做伊的拐仔  
伊講閣毋是攏袂矣  
聽這支就知影，頭前  
有路無路

我也是覘遠遠看伊  
目睷無看著按怎摸有路  
原來是用彼支掃帚柄的拐仔  
頭前砣一下、倒片砣一下、正片砣一下  
一聲一聲行

【  
0  
4  
9  
】  
拐仔聲

- 📖 1) 閣毋是攏袂矣：又不是都沒用沒辦法了！  
2) 砣(khok)：敲碰撞。



## 起火日誌

日頭予阮記持  
月娘子阮回憶，只有你  
相依相隨，黏黏日誌  
想著你，愛閣一頁一頁  
掀去少年時

彼一夜，風雨潑入來厝內的壁堵  
阿爸排面桶跤桶咧承水  
規本日誌澹澹糊糊去  
阿爸講一日一日共劈劈落來  
曝焦通起火

【  
0  
5  
0  
】  
起火日誌



- PS 1) 劈 (li): 撕下。  
2) 曝焦通起火: 曬乾當引火用。